

編號 / 號

【蘋果】徐姿華原作

在臺灣，蘋果係無幾見奇个水果，一年四季儘採哪隻水果攤都看得著，毋過，蘋果个魔力，係從細斯深深種在佢心肝肚、圓落佢腦膈肚个。

佢兜三姊妹一個一個續等出世了後，屋下个開銷也日見日增加，阿爸就摺阿媽參詳，講佢決定愛放忒屋下該垵出息無多个薄田，出外食頭路。為著賺較多兜錢，阿爸去應<sup>1</sup>著水壩工程个十輪牯運轉手，愛配合工地時間出車，一隻月正有好歇睏兩日定定。

阿爸當珍惜摺屋下人共下个時間，放寮前一日下班，斯透夜趕轉來，轉到屋下長下轉點咧，佢兜早斯睡到尿牖孔孔，阿爸會輕手輕腳來間肚巡，看佢兜有睡好無？有踢被無？佢會摺睡到橫架直架个佢兜拗起來睡正，又摺佢兜个被蓋好，還會咬佢兜个面頰卵，分阿爸短短个鬚菇劊著<sup>2</sup>，又痲<sup>3</sup>又痛又虐削，目睡覺分阿爸吵醒起累贅<sup>4</sup>，目睡摸些<sup>5</sup>哇哇滾嗽眊，阿媽斯會嚶嚶滾<sup>6</sup>，喊佢毋好

<sup>1</sup> 應：音 rhin<sup>ˊ</sup>；允諾。

<sup>2</sup> 劊著：音 cam do<sup>ˊ</sup>；刺到。

<sup>3</sup> 痲：音 hoi；癢。

<sup>4</sup> 起累贅：音 hi<sup>ˊ</sup> lui<sup>ˋ</sup> dui<sup>ˋ</sup> / hi<sup>ˊ</sup> lui<sup>ˋ</sup> zhui<sup>ˋ</sup>；要賴。

<sup>5</sup> 目睡摸些：音 mug shoi+ mia<sup>ˋ</sup> sia<sup>ˋ</sup>；睡眠惺忪的樣子。

搵耍<sup>7</sup>人，阿爸會牙牙蛇蛇<sup>8</sup>講：「恁久無看著咧，佢當想佢个心肝妹啊！」還當想愛睡个佢，一下仔又迷迷痴痴睡忒咧，毋過睡夢中仰會鼻著香香甜甜當好鼻个味道呢？

第二日朝晨跣床，枕頭脣有一隻又紅又大个蘋果，該香香个氣味斯係昨暗瞞目睡覺鼻著个，該大蘋果還錫人哪！係阿爸轉來咧！佢一想真，遽遽跳下眠床，來毋掣著鞋斯颯等出去，阿爸坐在飯桌前牙喊喊仔<sup>9</sup>看等佢，佢黏時就跳到阿爸个大腳髀頂高坐等，兩隻手纏等阿爸个頸根，摺阿爸做嬌。阿媽兜等一鑊燒燒个糜行過來，看著恁樣形笑笑仔講：「還做嬌哦！遽遽去洗嘴洗面好食朝咧！」佢還係毋肯下來，捕等阿爸像一條無尾熊，阿爸笑到哈哈滾，企跣起來摺佢捕去洗身間洗嘴洗面。

阿爸知佢好食蘋果，逐擺做事轉來，斯會買蘋果放在佢个枕頭脣，分佢做得發一隻香香甜甜个夢。佢知阿爸惜佢，佢也知佢當愛阿爸。該蘋果个香氣、靚靚个外形摺脆脆甜甜个好味緒，毋知對哪時斯刻落佢个心肝肚咧，該蘋果斯係阿爸愛佢、惜佢个印記。

<sup>6</sup> 嚶嚶滾：音 giau giau gun<sup>ˊ</sup>；心有不滿的怨聲。

<sup>7</sup> 搵耍人：音 med sa<sup>ˋ</sup> ngin<sup>ˋ</sup>；捉弄人。

<sup>8</sup> 牙牙蛇蛇：音 nga nga sha sha；不正經。

<sup>9</sup> 牙喊喊仔：音 nga ve<sup>ˋ</sup> ve<sup>ˋ</sup> er；牙齒微露微笑的樣子。

編號 2 號

【鬧熱个落水天】曾菁怡原作

鬧鐘鈴～鈴～鈴～響咧！大嫲聲喊佢遽遽趺床，再過忍床就會赴毋掣去學校讀書咧。佢目西西伸手掀忒鬧鐘，又過橫落舒適个眠床，毋盼得摺佢分開。欸！毋係天光咧？外背仰還係暗摸胥疏？探頭看出去，原來係天公派烏雲使者來通知佢兜——愛落水咧！

有人認為落水天係麻煩天，出門愛著水衣，無就擎遮仔，係無細義，衫褲又會涿到溼溶溶仔，去哪就毋方便。學生仔最惱無法度出去打球仔、搞寮，一下課先生就掌等，麼人都做毋得出去涿水，所以一看啊著落水，大家就唉唉唧唧，目盯盯仔看等雨水號等歸隻運動坪，實在還愠悴哦！

毋過，落水天對佢來講顛倒係盡鬧熱个日仔。朝晨頭一出門，滿街路就係淦淦个車仔，這片嘩嘩；該片叭叭，像久見个朋友相借問樣，大家相賽講起恁久無看著个思念。該兜行路个人，擎等一支支遮仔花，分雨水一滋潤，就開出五彩个花來，行來行去像比麼人个花較靚。你係聽較真兜，該雨水打在車頂、屋頂、水窟抑係樹葉仔頂高个聲音全部無共樣，有高、有低；有大聲、

有細聲，像唱歌仔分你聽樣。成時，雷公還會用曠爐打燈光，用響雷伴奏，你講，係毋係已生趣？

佢當好在落水天打早就去學校，因為該兜平常時固核核个蝓螺、蟲蟻全部都會趁出來搞水。學校圍牆係紅毛泥作个，壁頂个溜苔青里里仔，落水該下，蝓螺爬上爬下陣打陣，有个相賽看麼儕爬較遽，有个彎來幹去做起畫圖个藝術家，又有个停跔在圍牆頂高享受涿水个清涼，逍遙自在。

落水天出來搞寮个蟲蟻盡好膽，衫褲無著就緊拚拚仔出來搞水，溝壩肚朗朗滾个水流已刺激，幾尾蟲蟻分水沖過去還會搖來擺去，暢到奈毋得。有个蟲蟻大擘擘仔趁到路町來，較砸身个還做得趁轉去；較嫚个將就橫在路徑頭，分天公做主咧！

鬧熱个落水天，有人懊惱，有人歡喜，天公無法度分逐儕納意，佢們就愛自家改變想法，不管麼个天都係盡好个天。

【避暑】葉美伶原作

鳳凰樹榮榮、細細个花開到鬧熱煎煎，日頭緊來緊烈，企在樹下看往上，晟到人瞷目毋開，長下還聽得著樹頂蟬仔，「知了～知了～知了～」，放勢牯唱等這隻季節正有个歌曲。

逐年這下係佢最快樂个時節！等學期結束，放棄該下，阿爸會送佢轉莊下摻講客个阿公、阿婆培養感情。戴在莊下無冷氣，毋過，闊闊个瓦屋當涼，若係暗晡頭特別熱个時節，阿婆就會擎支扇仔摻佢撥涼，撥啊撥仔，毋多知佢就睡忒咧。老屋面前有一隻當闊个禾埕，阿婆講頭擺係晒穀用个，這下穀收成後直接載去穀倉焙，毋使日頭晒，也毋驚下晝頭个風時水。阿婆講著頭擺艱苦个日仔，成時還會偷偷仔掙目汁。這下禾埕變成停車場咧，下把仔<sup>1</sup>係晒菜脯、晒鹹菜乾个好所在，也係佢兜細人仔伴个遊樂場。

大門口種有一頭蓮霧樹，總係打到當結，歸樹襤襤吊吊。逐年到這時節就像摻佢講：「歡迎光臨！佢為著你煞猛打子，就像阿公、阿婆心肝肚恁恁个愛，望等子孫轉來。」屋面前還有一條

<sup>1</sup> 下把仔：音 ha<sup>+</sup> ba<sup>+</sup> er；有時候。

圳溝歸日泉水流流流流，這下還捉得著蝦公，阿婆講就算天旱七毋使驚，泉水分恁俚个恩情恁俚愛知好惜。在烈烈个日頭下，最清涼个享受係去泗水仔、覓蜆仔、捉蝦公、搞相庠水，在收成後个田肚燿窯仔、搞騎馬打戰、份家啦，這兜全部都分佢摻細人仔伴搞到歡喜震天，也係佢避暑快樂个生活。

一曠日，佢讀小學三年生咧，阿姆安排佢避暑去補習。逐日關在冷氣間肚，歸隻人像拉絛<sup>2</sup>个弓，身材變到又高又瘦，也變到較白淨，歸日像極樂仔樣挨無停。佢想阿公、阿婆个莊下；想蓮霧還等等佢去摘；想摻隔壁鄰舍个細人仔伴共下搞園人尋。

阿爸講，恁俚客家人最重要个兩件事：讀書摻耕種。人講「晴耕雨讀」，所以，愛出頭天讀書第一重要。毋過，阿爸也會挪工載全家大細轉去看阿公、阿婆。其實，佢最毋盼得个係，無法度逐日聽著阿公、阿婆講佢該量時好聽个客家古。

<sup>2</sup> 絛：音 hen；緊。